



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 412
fax. +387 33 726 423
e – mail: info@voda.ba

Broj: **UP-1/21-1-40-372-8/22**

Datum: **23.12.2022. godine**

«Agencija za vodno područje rijeke Save» Sarajevo, rješavajući po zahtjevu Općine Foča u FBiH, za izdavanje prethodne vodne saglasnosti za izgradnju mosta preko rijeke Drine u naselju Cvilin, općina Foča, na osnovu člana 109. stav 1. tačka 10. Zakona o vodama («Službene novine Federacije BiH» broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 49/99 i 61/22) **donosi**

RJEŠENJE **o prethodnoj vodnoj saglasnosti**

1. Podnosiocu zahtjeva, Općini Foča u FBiH, daje se prethodna vodna saglasnost za izgradnju mosta preko rijeke Drine za naselje Cvilin, na prostoru općine Foča, a u postupku pribavljanja urbanističke saglasnosti.
2. Prethodna vodna saglasnost se daje na osnovu pregleda dostavljene projektne i druge dokumentacije i pod sljedećim uslovima:
 - 2.1 Da korisnik prava iz prethodne vodne saglasnosti osigura izradu tehničke dokumentacije (na nivou Glavnog projekta) na osnovu koje će se vršiti izvođenje radova na izgradnji mosta preko rijeke Drine u naselju Cvilin, općina Foča. Tehnička dokumentacija treba biti urađena i revidovana od strane pravnih lica koja imaju ovlaštenja (lista "A") pribavljena od strane Federalnog ministarstva poljoprivrede, vodoprivrede i šumarstva i treba da obradi sva pitanja definisana članom 5. stav (2) Pravilnika o sadržaju, obliku, uvjetima, načinu izdavanja i čuvanja vodnih akata ("Službene novine Federacije BiH" broj 31/15, 55/19, 41/20 i 63/22).
 - 2.2 Sa vodoprivrednog aspekta kota donje ivice konstrukcije mosta, u polju i na osloncima, treba da bude viša za minimalno 80 cm računajući i proračunati uspor u odnosu na kotu velike vode rijeke Drine ranga pojave 1/100 godina, **odnosno najniža kota donje ivice konstrukcije mosta treba biti min. 378,95 m n.m..**
 - 2.3 Obalni upornjaci mosta, u odnosu na prirodni poprečni profil korita rijeke Drine, trebaju imati takav položaj da ne smanjuju proticajni profil korita i ne narušavaju stabilnost korita.
 - 2.4 Sastavni dio investiciono - tehničke dokumentacije za izgradnju mosta treba biti i Elaborat/projekat u kojem će se provesti hidraulički proračun propusne moći projektovanog otvora mosta, odrediti nivo stogodišnje velike vode na lokaciji mosta sa uzimajući u obzir rezultate proračuna uspora izazvanog smanjenjem proticajnog profila uslijed mostovske konstrukcije. Provesti hidraulički proračun za dionicu uzvodno i nizvodno od mosta, utvrditi vučne napone u koritu te za slučaj ako su veći od dozvoljenih u prirodnim koritu odrediti potrebnu dužinu prelaznih dionica od obalnih upornjaka do prirodnog korita sa oblaganjem kosina korita u svrhu zaštite od erozije.
 - 2.5 U projektnoj dokumentaciji dati tehničko rješenje sistema za prikupljanje i ispuštanje oborinskih voda sa konstrukcije mosta u recipijent, definisati mjesto ispuštanja oborinskih voda u recipijent te dati detalj ispusta.
 - 2.6 Projektom dokumentacijom definisati organizaciju i tehnologiju izvođenja radova na izgradnji novog mosta kojom će se moguće štete u koritu i na obalama rijeke Drine, odnosno moguće štetne promjene režima voda svesti na najmanju moguću mjeru.
 - 2.7 Predmjerom radova predvidjeti i radove na uklanjanju svih pomoćnih objekata i radove na čišćenju i uređenju korita i obala po završetku izgradnje mosta, uređenju korita r. Drine u zoni obalnih upornjaka mosta, odvodnju oborinskih voda i dr.
 - 2.8 Pri izradi projektne dokumentacije pažnju posvetiti na položaj postojećih instalacija (vodovodne, kanalizacione, elektro, PTT i dr.) te dati tehničko rješenje za ukrštanje ili izmještanje istih.

- 2.9 Projektnom dokumentacijom treba, u skladu sa zakonskim propisima, definisati način privremenog pa sve do konačnog zbrinjavanja otpada koji će nastati u toku izgradnje novog mosta i uređenja korita vodotoka u zoni radova.
- 2.10 Pri izradi tehničke dokumentacije pridržavati se pravila struke i nauke te zakonske regulative vezane za ovakvu vrstu radova te ekološko-ekonomskih zahtjeva.
- 2.11 Sagledati sve moguće neželjene uticaje na planirani objekat i planiranog objekta na druge objekte i postrojenja, stečena prava korisnika, postojeću infrastrukturu, naselja i slično, te dati prijedlog mjera za sprječavanje tih uticaja u toku izgradnje i korištenja mosta uključujući i standardne i dodatne mjere zaštite.
3. Po izradi investiciono-tehničke dokumentacije, u skladu sa uslovima iz tačke 2. dispozitiva ovog Rješenja, korisnik prethodne vodne saglasnosti dužan je da ovoj Agenciji podnese zahtjev za izdavanje vodne saglasnosti na izrađenu projektnu dokumentaciju.
4. Zahtjev za izdavanje vodne saglasnosti dostavlja se u skladu sa članom 8. i 19. stav (2) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj 31/15, 55/19, 41/20 i 63/22).

Uz zahtjev se, između ostalog, prilaže:

- 4.1 Revidovana Investiciono-tehnička dokumentacija (glavni projekat), u skladu sa uslovima navedenim u tački 2. ovog Rješenja.
- 4.2 Elaborat/projekat u kojem će se provesti hidraulički proračun propusne moći projektovanog otvora mosta, odrediti nivo stogodišnje velike vode na lokaciji mosta sa proračunom uspora uslijed mostovske konstrukcije te minimalnu kotu donje ivice mosta uz potrebno nadvišenje od 0,80m.
- 4.3 Rješenje o urbanističkoj saglasnosti i okolinskoj dozvoli.
- 4.4 Dokaz o izvršenoj uplati upravne takse u iznosu od 60 KM.
5. Ovu prethodnu vodnu saglasnost će Investitor koristiti u postupku dobijanja urbanističke saglasnosti i okolinske dozvole i ona definiše uslove koje projektna dokumentacija treba ispuniti sa aspekta voda u skladu sa Zakonom o vodama.
6. Prethodna vodna saglasnost se daje sa rokom važenja od 3 (tri) godine od dana pravosnažnosti ovog rješenja, u skladu sa članom 111. stav 3. Zakona o vodama.
7. Ukoliko nakon izdavanja ove prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavijestiti ovu Agenciju, odnosno kantonalno ministarstvo, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.
8. Ova prethodna vodna saglasnost se može izmjeniti ukoliko nastupe razlozi utvrđeni u članu 130. stav 1. tačka (1)., (2)., (3). ili (4). Zakona o vodama («Službene novine Federacije BiH», broj 70/06), a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Od strane Općine Foča u FBiH, dana 22.07.2022. godine, zaprimljen je zahtjev broj 01-1-21-841/22 za donošenje rješenja o prethodnoj vodnoj saglasnosti za izgradnju novog mosta preko rijeke Drine za naselje Cvilin, na prostoru općine Foča, Ustikolina, a u postupku pribavljanja urbanističke saglasnosti za izgradnju istog.

Uz zahtjev je dostavljena i pregledana slijedeća dokumentacija:

- Kopija Obavještenja o razvrstavanju pravnog lica prema klasifikaciji djelatnosti broj: 07-32.5-4657/15 od 27.02.2015. godine izdato od Federalnog zavoda za statistiku Sarajevo - Ured za statistiku za područje Bosansko-podrinjskog kantona;
- Zakon o konstituiranju novih općina u Federaciji BiH («Službene novine Federacije BiH», broj 06/98);
- Kopija katastarskog plana, R 1:35000, broj plana 5. K.O. Cvilin, UR broj: 05-7-26-356/2022-2 od 24.08.2022. godine izdato od Službe za prostorno uređenje, komunalne, geodetske-katastarske, stambene poslove, imovinsko-pravna pitanja, izbjegla i raseljena lica, Općina Foča;

- Kopija katastarskog plana, R 1:7500, broj plana 1. K.O. Ustikolina, UR broj: 05-7-26-356/2022-3 od 24.08.2022. godine izdato od Službe za prostorno uređenje, komunalne, geodetske-katastarske, stambene poslove, imovinsko-pravna pitanja, izbjegla i raseljena lica, Općina Foča;
- Mišljenje o usklađenosti planirane aktivnosti sa dokumentima prostornog uređenja broj: 09-23-365-1/17 od 20.09.2017. godine izdato od Službe za urbanizam, prostorno uređenje i zaštitu okoline, BPK Goražde;
- Kopija odluke o pristupanju izgradnji novog mosta preko rijeke Drine za naselje Cvilin, broj: 01-1-19-760/22 od 17.06.2022. godine, Općinsko vijeće, Općina Foča;
- Zemljišnoknjižni izvadak, zk uložak broj: 168, za zemljišnu česticu k.č. broj 1044 K.O. Ustikolina, izdat od strane Općinskog suda u Goraždu, 15.07.2022. godine (ovjerena kopija);
- Zemljišnoknjižni izvadak, zk uložak broj: 132, za zemljišnu česticu k.č. broj 3898/1 K.O. Cvilin, izdat od strane Općinskog suda u Goraždu, 15.07.2022. godine (ovjerena kopija);
- Dokaz o uplaćenju upravnoj taksi;
- Studija za ishodovanje prethodne vodne saglasnosti za novi most preko rijeke Drine u Ustikolini, oktobar 2022. godine, urađena od „HIGRACON“ d.o.o. Sarajevo;

Nakon izvršenog uvida u dostavljeni zahtjev i priloženu dokumentaciju utvrđeno je da uz zahtjev nisu dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari i zatražio dopunu podneska u skladu s članom 19. Pravilnika o sadržaju, obliku, uvjetima, načinu izdavanja i čuvanja vodnih akata („Službene novine Federacije BiH, broj 31/15, 55/19, 41/20 i 63/22) dopisom broj: UP-1/21-1-40-372-2/22 od 03.08.2022. godine u kojem je zatraženo od podnosioca zahtjeva da isti upotpuni u roku od 20 (dvadeset) dana od dana urednog prijema dostavljene obavijesti.

Dana 29.08.2022. godine, Investitor je uz dopis broj: 01-1-21-841-1/22 od 25.08.2022. godine, dostavio dio tražene dopune uz napomenu da je Studija u procesu izrade i da će se ista dostaviti naknadno. Dopisom broj: 01-1-21-841-2/22 od 02.11.2022. godine dostavljen je preostali dio dopune podneska - Studija, dana 07.11.2022. godine.

U skladu sa članom 124. stav (1) Zakona o vodama i člana 21. Pravilnika o sadržaju, obliku, uslovima, načinu izdavanja i čuvanja vodnih akata („Službene novine Federacije BiH“, broj 31/15, 55/19, 41/20 i 63/22) o zahtjevu je dana 09.11.2022. godine obaviještena javnost putem obavještenja na oglasnoj ploči «Agencije za vodno područje rijeke Save» Sarajevo i u dnevnim novinama „OSLOBOĐENJE“. U datom roku, 14.11.2022. godine, o predloženim aktivnostima iz zahtjeva dostavljeno je pisano izjašnjenje JP Elektroprivreda BiH d.d. Sarajevo, broj: 07-30666-1/2022, sa idejnim projektom – akumulacioni bazen – linija uspora HE Ustikolina (CD), kako bi se mogla sagledati eventualna kolizija planiranog mosta sa nivoom vode planirane akumulacije HE Ustikolina.

Vlada Federacije Bosne i Hercegovine je donijela Odluku o utvrđivanju javnog interesa za izgradnju elektroenergetskih objekata u Federaciji BiH (Službene novine Federacije BiH, broj 69/12) kojom se utvrđuje javni interes na nekretninama koje su označene u Elaboratima o ekspropijaciji, između ostalih objekata, i hidroelektrane «Ustikolina».

Na osnovu uvida u dostavljeni idejni projekat odnosno liniju uspora planirane akumulacije HE Ustikolina utvrđeno je da se uspor formira do kote 378,15 m n.m. te je u odnosu na ovu kotu propisana minimalna kota donje ivice konstrukcije mosta u tački 2.2. (desna obala).

Na osnovu objave - oglašavanja u dnevnom listu „Oslobođenje“, Podnosioc je po Zaključku o visini i roku za plaćanje posebnih troškova broj: UP-1/21-1-40-372-5/22 od 22.11.2022. godine, uplatio dana 28.11.2022. godine račun broj: 4526-104000-1 dostavljen od Oslobođenje servisi d.o.o. Sarajevo.

Na osnovu uvida u dostavljenu dokumentaciju utvrđeno je slijedeće:

Studijom je obuhvaćena izgradnja mosta ukupne dužine 184,0 m. Most će omogućiti pješački i cestovni saobraćaja između centra općine na lijevoj obali sa naseljem Cvilin na desnoj obali rijeke Drine.

Statički sistem objekta je kontinualni nosač sa uklještenjima na mjestima svih oslonaca (obalnih i srednjih stubova), koji čini spregnuta konstrukcija osovinog raspona od 41 m. Ukupna širina rasponske konstrukcije mosta iznosi 9,30 m.

Stubna mjesta se sastoje od 4 armirano-betonska stuba u poljima i dva upornjaka na početku i kraju mosta. Predviđeno je temeljenje na šipovima sa naglavnim pločama. Temeljenje obalnih stubova je predviđeno na šipovima prečnika 150 cm. Most je projektovan za dvosmjerni saobraćaj, sa dvije saobraćajne trake i obostranim pješačkim stazama. Širina kolovoznog dijela mosta je 5.5 m, sa dvije pješačke staze širine po 1.0 m. Ukupna širina rasponske konstrukcije mosta iznosi: $0.20+1.0+0.50+0.20+2.75+2.75+2.5+0.20+0.50+1.0+0.20=9.3$ m. Situaciono most je u pravcu.

Donja ivica konstrukcije mosta mora biti udaljena minimalno 80 cm iznad nivoa stogodišnje vode, odnosno linije uspora planirane akumulacije HE Ustikolina.

U dostavljenoj „Studiji za ishodovanje prethodne vodne saglasnosti za novi most preko rijeke Drine u Ustikolini“, urađenoj od strane „HIGRACON“ d.o.o. Sarajevo, priložen je hidraulički proračun preuzet iz Glavnog projekta Uređenja lijeve obale rijeke Drine u Ustikolini, Bičakčić d.o.o. Sarajevo, 2009. godine, te su prezentovani podaci na profilu mosta: $Q_{1/100}=3232,0 \text{ m}^3/\text{s}$, $H_{1/100}=375,93 \text{ m n.m.}$. Također je naveden i podatak iz „Novelacije projekta Uređenja lijeve obale rijeke Drine u Ustikolini“ Zavod za vodoprivredu d.o.o. Sarajevo, iz 2015. godine, po kojem su izvedeni radovi na uređenju obale korita, sa nivoom dopiranja velikih voda $H_{1/100}=375,98 \text{ m n.m.}$.

Uvidom u ažurne podatke Agencije za vodno područje rijeke Sava o velikim vodama povratnog perioda 1/100 za rijeku Drinu koji su dobijeni pri izradi hidrodinamičkog modela rijeke Drine urađenog za potrebe projekta Izrada Mapa opasnosti i mapa rizika za Bosnu i Hercegovinu, koji je izrađen na detaljnim podlogama dobivenim snimanjem Lidar tehnologijom, dobivene su slijedeće vrijednosti: $Q_{1/100}=3357,59 \text{ m}^3/\text{s}$, $H_{1/100}=377,93 \text{ m n.m.}$.

Usporedbom sa Idejnim projektom - linija uspora planirane akumulacije HE Ustikolina, dostavljenim od strane JP Elektroprivreda BiH d.d. Sarajevo, kojim je utvrđeno je da se uspor planirane akumulacije HE Ustikolina formira do kote 378,15 m n.m. propisano je zaštitno nadvišenje od 80cm u odnosu na ovu kotu, te je, uvažavajući navedeno, propisana najniža kota donje ivice mostovske konstrukcije.

Na bazi tako određene linije dopiranja velikih voda (378,15 m n.m.) i potrebnog nadvišenja mostovske konstrukcije od 0,80m potrebno je prilagoditi niveletu mosta.

Dokaz da se ovaj uslov uvažio priložiti uz zahtjev za izdavanje vodne saglasnosti u skladu sa tačkom 2.2. dispozitiva rješenja.

Nakon uvida u dostavljenu dokumentaciju, utvrđeno je da, shodno članu 7. i članu 12. stav (1) tačka 1. Zakona o vodama, sa aspekta sektora voda ne postoje smetnje da se Općini Foča izda prethodna vodna saglasnost za izgradnju mosta preko rijeke Drine, pod određenim uslovima.

Uslovi, koji se trebaju ispoštovati prilikom izrade projektne dokumentacije, a koja je potrebna u postupku pribavljanja vodne saglasnosti i odobrenja za građenje, definisani su u dispozitivu ovog rješenja u skladu sa odredbama Zakona o vodama i Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22).

Podnosilac zahtjeva je uplatio upravnu taksu u iznosu od 80 KM u skladu sa Zakonom o federalnim upravnim taksama i tarifi federalnih upravnih taksi («Službene novine Federacije BiH», broj 6/98, 8/00, 45/10 i 43/13).

UPUTA O PRAVNOM LIJEKU:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja. Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife Federalnih administrativnih taksi.

Voditelj postupka
Nihad Pezo, dipl.inž.građ.

**Po ovlaštenju
Rukovodilac sektora za izdavanje
vodnih akata**


Haris Ališehović, dipl.inž.građ.

Dostaviti:

- Općina Foča, Omladinska bb. 73250 Ustikolina
- AVP Sava, ISV - vodna knjiga - ovdje
- ☉ Arhiva - ovdje
- Oglasna ploča AVP Sava